

24. RÁMAS vero, ob loci propinquitatem BHARATÆ reditum timens, reliquit *Chitrakútæ* regionem, cuculis mœste canentibus frequentatam.

25. Procedebat ille, commorans in hospitalibus vatum eremis, regionem meridionalem versus, veluti sol in signis autumnalibus commorans.

26. Illum secuta *Videhæ* regis filia apparebat, veluti splendor regius, etiamsi a KAIKEYI prohibitus, illius virtutibus allectus.

27. Ejus membrorum unguento, ab ANUSÚYA donato, suaves odores diffundente, apes e sylvæ floribus eliciebantur.

28. Stetit ibi *Rákshasus* quidam, VIRÁDHAS appellatus, nubis vespertinæ instar fuscus, RÁMÆ viam præcludens, veluti RÁHUS lunæ viam.

29. Abripuit ille ex utriusque fratris medio puellam *Mithilensem*, veluti siccitas pluviæ abripit inter *Srávanam* et *Bhádrapadam* menses.

30. Quem cum occidissent juvenes KAKUTSTHIDÆ, antequam putido suo fœtore regionem contaminaret, in terra defoderunt.

31. Deinde RÁMAS, rectitudinis limites haud excedens, ab AGASTYA jussus, restitit in *Panchavati*, veluti *Vindhyas* mons in altitudine sua, quam a principio habebat.

32. Ibi RÁVANÆ soror natu minor, amore perculsa, accessit RAGHUIDEN, veluti serpens, æstu vexatus, arborem in *Malaya* monte.

33. Illa, ipsa SÍTA præsentē, RÁMÆ favorem captabat, originem suam ei narrans: etenim mulierum amor, quando nimis auctus, tempus haud respicit.

34. “ Equidem uxorem habeo, puella, hujus fratris mei minoris amorem “ capta!” Ita RÁMAS, humeris taurinis præditus, illam viri cupidam exhortabatur.

35. Illa, antequam ad majorem sese converteret, ab eo quoque non accepta, iterum ad RÁMAM confugit, fluvii instar, utramque ripam lambentis.

36. SITÆ risus puellam pulchram iratam reddidit, veluti luna oriens oceani fluctum, qui, protectus a vento, tranquillus restabat.

37. “ Risus tui fructum statim adipiscere, adspice me! Scito, facinus “ tuum esse, veluti contemptus, tigridi ostensus a caprea!”